



明牯个兩隻世界

「明牯！日頭炙屎肚咧！會赴毋著讀書囉！」阿嬤逐晨早就毋知愛喊幾多遍。

「係知啦！毋好喊咧啦！」明牯應無兩下又睡忒咧！

「仰還毋貽起啊！……唉！」阿嬤逐晨早就喊到當無奈何。

「好啦！好啦！……唉！」明牯也應到當無奈何，毋甘毋願貽起來換衫褲。

「明明係還當想睡！仰大人強強愛喊係貽起呢？還愛追係去學校讀書！」明牯目澀澀想。

逐日晨早係明牯最艱苦个時節，尤其係先生講課該下，明牯時常就「啄！啄！啄！」變成目睡鳥。先生睭著會喊佢企起來，話佢早兜睡，毋好爽電腦爽到恁夜，還會打電話通知厥嬤。毋過，經過一站時間，明牯還係共樣無變，顛倒連下課時節大家在外背爽，佢還在教室肚覆等睡，有時睡到上課鐘響還毋知醒！先生輒輒問佢仰會無法度早兜睡，明牯總係應講電腦爽起來就完全毋知時間，原來，明牯个爺哀無共下以後，佢爽電腦个時間就緊來緊長。

在學校肚，明牯差毋多愛到第二節課上煞正慢慢變精神，正較有氣力來讀書。等放學轉到屋下、坐到電腦面前，佢歸隻人就返生變成爽電動个高手，升級、破關全難佢毋著。

「愛去哪位提寶物？」阿賢尋去尋轉尋毋著問佢。

「煞兜來救佢啊！」雄牯分怪獸圍著，會打輸忒咧，摻佢討救兵！

「續下來愛仰般行？」阿忠毋知愛選哪條路？拜託佢選。

明牯係厥同學爽電動个顧問，也係同學心肝肚个電動爽頭王摻英雄，佢爽電動个時節非常煞手，非常有自信，摻學校肚个明牯完全係無共隻世界个人，難怪佢逐擺會爽到毋知時間。

摻明牯較熟个同學大體知佢好爽網路遊戲，毋好用社群網站，因為明牯睭著同學摻屋下人共下去餐廳食東西、共下出去寮到歡歡喜喜个相片，會變到當艱苦、當想喏。佢除忒阿嬤以外，罕得摻其他親人共下，到久來，佢將就無愛摻其他人來往，一心一意爽佢最沙鼻个網路遊戲。

有一日，明牯直直睡到晝無去讀書，等醒咧，佢跳起來尋阿嬤，正知阿嬤人毋好，無法度喊佢貽起，從該量時起勢，明牯了解佢个世界就一隻定定。

作者：林伯殷

☆詞彙學習☆

【日頭炙屎肚】ngid` teu zhag` shi` vud`：

太陽晒屁股。比喻時間不早了。

【目澀澀】mug` seb` seb`：想睡的樣子。

【目睡鳥】mug` fe` diau`：常打瞌睡的人。

【輒輒】ziab ziab：時常、屢屢。

【返生】fan` sang`：死而復生。

【爽頭王】song` teu vong`：帶頭玩耍的人。

【煞手】sad` shiu`：果決。

【將就】ziong` ciu`：乾脆。

【沙鼻】sa` pi`：得意、驕傲的樣子。